
SIARAN MEDIA

MyCC CADANG GRAB DIDENDA RM86 JUTA KERANA AMALAN MENINDAS

KUALA LUMPUR, 3 OKTOBER 2019 – Suruhanjaya Persaingan Malaysia (MyCC) telah mengeluarkan Keputusan Cadangan terhadap Grab Inc., GrabCar Sdn. Bhd. dan MyTeksi Sdn. Bhd. (selepas ini kesemuanya dirujuk sebagai 'Grab') kerana melanggar Seksyen 10 Akta Persaingan 2010 (AP 2010) secara kolektif. MyCC dalam keputusan cadangannya mendapati Grab telah menyalahgunakan kedudukan dominannya melalui penganan beberapa klausa yang membataskan pemandu-pemandunya daripada mempromosikan dan menyediakan perkhidmatan pengiklanan kepada pesaing-pesaing Grab dalam perkhidmatan *e-hailing* dan pasaran pengiklanan media transit.

MyCC juga ingin menekankan bahawa klausa-klausa itu telah memberikan kesan mengganggu persaingan dalam pasaran berkenaan yang berpremiskan kepada platform pelbagai sisi dengan mewujudkan halangan kemasukan dan perkembangan kepada pesaing-pesaing Grab yang sedia ada termasuk pesaing-pesaing masa hadapan.

Berikutan penggabungan di antara Grab dan Uber pada lewat Mac 2018, Grab telah menjadi pemain dominan di dalam pasaran *e-hailing*. Sejak penggabungan itu, MyCC telah menerima banyak aduan terhadap Grab. Berdasarkan aduan-aduan tersebut, MyCC telah membuat penilaian dan memulakan penyiasatannya ke atas Grab.

“Ianya adalah penting bagi halangan-halangan kemasukan ke dalam pasaran buat pemain baru kekal rendah dan keupayaan pesaing-pesaing untuk berkembang dan bersaing berdasarkan merit dikekalkan untuk memastikan persaingan sentiasa sihat di dalam pasaran *e-hailing* termasuk pasaran-pasaran lain yang berkaitan. MyCC berpandangan bahawa perlakuan Grab bukan sahaja mempunyai kesan kepada pemandu-pemandu *e-hailing* dan pesaing-pesaingnya, malah mempunyai kesan jangka masa panjang kepada pengguna. Walaubagaimanapun, disebabkan ini bukanlah keputusan akhir, Grab mempunyai peluang untuk mengemukakan

pembelaannya dalam masa yang akan ditetapkan.” kata Encik Iskandar Ismail, Ketua Pegawai Eksekutif MyCC.

MyCC bercadang untuk mengenakan penalti kewangan berjumlah RM86,772,943.76 terhadap Grab serta penalti kewangan harian sebanyak RM15,000 sehari bermula daripada hari penyerahan keputusan cadangan kepada Grab sekiranya mereka gagal untuk mengambil tindakan-tindakan pembetulan seperti yang telah diarahkan oleh MyCC untuk menangani isu-isu persaingan berkaitan.

Keputusan cadangan yang dikeluarkan ini, selaras dengan Seksyen 36 AP2010, adalah notis bertulis menyatakan fakta-fakta yang membolehkan MyCC menilai dan menyatakan sebab-sebab untuk keputusan cadangannya. Ia dikeluarkan kepada syarikat-syarikat terbabit bagi membantu mengemukakan representasi serta apa-apa maklumat lain bagi menyokong representasi mereka kepada MyCC.

Justeru, syarikat-syarikat yang terbabit mempunyai tiga puluh hari (30) daripada tarikh penerimaan keputusan cadangan untuk memberikan representasi mereka kepada MyCC. MyCC kemudiannya akan mengeluarkan keputusan akhir di bawah Seksyen 39 atau 40 AP 2010 setelah menilai kesemua representasi serta maklumat dan bukti yang diketengahkan. AP 2010 berkuatkuasa pada 1 Januari 2010 dan dengan itu, perniagaan haruslah patuh akan peruntukan-peruntukan yang terkandung di dalam AP 2010.

--tamat—

Untuk pertanyaan media, sila hubungi:

Noor Khalijah Mazlan, Tel +603 2273 2277 (ext 702),

Email: khalijah@mycc.gov.my

Bahagian Komunikasi dan Advokasi

Suruhanjaya Persaingan Malaysia

Suruhanjaya Persaingan Malaysia (Suruhanjaya Persaingan)

Ditubuhkan pada April 2011, Suruhanjaya Persaingan ialah satu badan bebas bertanggungjawab untuk menguatkuasakan Akta Persaingan 2010, yang dilaksanakan untuk menggalakkan persaingan sihat yang seterusnya akan merangsang produktiviti dan inovasi, lantas mewujudkan pilihan produk atau servis yang lebih banyak kepada pengguna dan kualiti yang lebih baik pada harga yang berpatutan.

Akta ini digunapakai kepada semua aktiviti komersil yang ditanggung didalam dan diluar Malaysia yang boleh menjejaskan persaingan di pasaran Malaysia. Ia memberikan satu rangka kerja kawal termasuk kuasa menyiasat, menghakimi dan mengenakan penalti-penalti kepada pesalah undang-undang persaingan.

Untuk maklumat lanjut tentang Akta dan Suruhanjaya Persaingan, sila rujuk laman web www.mycc.gov.my.

NOTA PENGARANG:

Cabutan daripada Seksyen 10 Akta Persaingan 2010:

Penyalahgunaan kedudukan dominan dilarang

10. (1) Suatu perusahaan dilarang untuk terlibat, sama ada secara sendirian atau kolektif, dalam apa-apa perlakuan yang berupa suatu penyalahgunaan kedudukan dominan dalam mana-mana pasaran bagi barangan atau perkhidmatan.

(2) Tanpa menjejaskan keluasan subseksyen (1), suatu penyalahgunaan kedudukan dominan boleh termasuk—

- (a) secara langsung atau tidak langsung mengenakan harga belian atau jualan yang tidak adil atau syarat perdagangan lain yang tidak adil ke atas pembekal atau pelanggan;
- (b) membataskan atau mengawal—
 - (i) pengeluaran;
 - (ii) saluran keluar pasaran atau capaian pasaran;
 - (iii) pembangunan teknikal atau teknologi; atau
 - (iv) pelaburan,sehingga memudaratkan pengguna;
- (c) enggan untuk membekalkan kepada suatu perusahaan atau kumpulan atau kategori perusahaan tertentu;
- (d) mengenakan syarat yang berlainan kepada transaksi yang setara (i) tidak menggalakkan kemasukan baru ke dalam pasaran atau pengembangan atau pelaburan oleh pesaing yang sedia ada; (ii) memaksa keluar dari pasaran atau selainnya merosakkan secara serius seorang pesaing yang sedia ada yang tidak kurang cekapnya berbanding dengan perusahaan dalam kedudukan dominan itu; atau

- (iii)memudaratkan persaingan dalam apa-apa pasaran yang disertai oleh perusahaan yang dominan itu atau dalam apa-apa pasaran hiliran atau huluan;
- (e) menjadikan pengikatan kontrak tertakluk kepada penerimaan oleh pihak lain akan syarat tambahan yang atas sifatnya atau menurut kegunaan komersial tidak mempunyai kaitan dengan hal perkara kontrak itu;
- (f) berkelakuan seakan pemangsa terhadap pesaing; atau
- (g) membeli barangan perantaraan atau sumber yang terhad bekalannya yang dikehendaki oleh seorang pesaing, dalam hal keadaan yang perusahaan dalam kedudukan dominan itu tidak mempunyai justifikasi komersial yang munasabah untuk membeli barangan perantaraan dengan pihak perdagangan yang lain ke suatu takat yang boleh—

(3) Seksyen ini tidak melarang suatu perusahaan yang dalam kedudukan dominan daripada mengambil apa-apa langkah yang mempunyai justifikasi komersial yang munasabah atau merupakan suatu respons komersial yang munasabah kepada kemasukan ke dalam pasaran atau perlakuan pasaran seorang pesaing.

(4) Hakikat bahawa bahagian pasaran mana-mana perusahaan adalah mengatasi atau di bawah apa-apa peringkat tertentu tidak dengan sendirinya boleh dianggap sebagai konklusif tentang sama ada perusahaan itu berada, atau tidak berada, pada suatu kedudukan dominan dalam pasaran itu.

Cabutan daripada Seksyen 36 Akta Persaingan 2010:

36. (1) Jika, selepas selesai penyiasatan, Suruhanjaya bercadang untuk membuat suatu keputusan bahawa salah satu larangan di bawah Bahagian II telah atau sedang dilanggar, Suruhanjaya hendaklah memberikan notis bertulis mengenai keputusan yang dicadangkannya kepada setiap perusahaan yang mungkin tersentuh secara langsung oleh keputusan itu.

(2) Notis itu hendaklah—

- (a) menyatakan sebab bagi keputusan yang dicadangkan oleh Suruhanjaya dengan perincian yang mencukupi bagi membolehkan perusahaan yang kepadanya notis itu diberikan mempunyai prospek yang benar dan mencukupi untuk membolehkannya membuat komen mengenai keputusan yang dicadangkan berdasarkan maklumat yang diketahui;
- (b) menyatakan apa-apa penalti atau tindakan pembetulan yang dicadangkan untuk dipakai oleh Suruhanjaya; dan
- (c) diberikan bahawa perusahaan itu boleh, dalam apa-apa tempoh yang munasabah sebagaimana yang dinyatakan dalam notis itu—
 - (i) mengemukakan representasi bertulis kepada Suruhanjaya; dan
 - (ii) menunjukkan sama ada perusahaan itu berhasrat untuk membuat representasi lisan di hadapan Suruhanjaya.

Cabutan daripada Seksyen 40 Akta Persaingan 2010:

39. Jika Suruhanjaya telah membuat keputusan bahawa tiada pelanggaran suatu larangan di bawah Bahagian II, Suruhanjaya hendaklah, tanpa kelengahan, memberikan notis keputusan itu kepada mana-mana orang yang tersentuh oleh keputusan itu menyatakan fakta yang berasaskannya Suruhanjaya membuat keputusannya dan sebab Suruhanjaya membuat keputusan itu.

Cabutan daripada Seksyen 40 Akta Persaingan 2010:

40. (1) Jika Suruhanjaya memutuskan bahawa terdapat suatu pelanggaran suatu larangan di bawah Bahagian II, Suruhanjaya—

- (a) hendaklah menghendaki supaya pelanggaran itu dihentikan serta-merta;
- (b) boleh menyatakan langkah yang perlu diambil oleh perusahaan yang melanggar, yang pada hemat Suruhanjaya adalah sesuai bagi menghentikan pelanggaran itu;
- (c) boleh mengenakan penalti kewangan; atau
- (d) boleh memberikan apa-apa arahan lain yang difikirkannya sesuai.

(2) Suruhanjaya hendaklah, dalam tempoh empat belas hari dari membuat keputusannya di bawah Bahagian ini, memberitahu mana-mana orang yang tersentuh oleh keputusan itu.

(3) Suruhanjaya hendaklah menyediakan dan menyiarkan sebab bagi setiap keputusan yang dibuatnya di bawah seksyen ini.

(4) Suatu penalti kewangan tidak boleh melebihi sepuluh peratus daripada pusing ganti seluruh dunia suatu perusahaan sepanjang tempoh suatu pelanggaran berlaku.